

資治通鑑

齊

治

通

卷

姓名上封事告之上曰圉師爲宰相侵陵百姓匿而不言豈非作威作福圉師謝曰臣備位樞軸以直道事陛下不能悉允衆心故爲人所攻訐至於作威福者或手握彊兵或身居重鎮臣以文吏奉事聖明唯知閉門自守何敢作威福上怒曰汝恨無兵邪許敬宗曰人臣如此罪不容誅遽令引出詔特免官癸酉立皇子旭輪爲殷王十二月戊申詔以方討高麗百濟河北之民勞於征役其封泰山幸東都並停 颶海道揔管蘇海政受詔討龜茲敕興昔亡繼往絕二可汗發兵與之俱至興昔亡之境繼往絕素與興昔亡有怨密謂海政曰彌射謀反請誅之時海政兵纔數千集軍吏謀曰彌射若反我輩無噍類不如先事誅之乃矯稱敕令大揔管齎帛數萬段賜可汗及諸酋長興昔亡帥其徒受賜海政悉收斬之其鼠尼施拔塞幹兩部亡

走海政與繼往絕追討平之軍還至踈勒南弓月部復引吐蕃之衆來欲與唐兵戰海政以師老不敢戰以軍資賂吐蕃約和而還由是諸部落皆以興昔亡爲冤各有離心繼往絕尋卒十姓無主有阿史那都支及李遮旬收其餘衆附於吐蕃是歲西突厥寇庭州刺史來濟將兵拒之謂其衆曰吾久當死幸蒙存全以至今日當以身報國遂不釋甲胄赴敵而死

三年春正月左武衛將軍鄭仁泰討鐵勒叛者餘種悉平之

乙酉以李義府爲右相仍知選事二月徙燕然都護府於回

紇更名瀚海都護徙故瀚海都護於雲中古城更名雲中都護以磧爲境磧北州府皆隸瀚海磧南隸雲中三月許圜師再

貶虔州刺史楊德裔以阿黨流庭州圜師子文思自然並免官右相河間郡公李義府典選恃中宮之勢專以賣官爲事銓

綜無次怨讟盈路上頗聞之從容謂義府曰卿子及壻頗不謹多爲非法我尚爲卿掩覆卿宜戒之義府勃然變色頸頰俱張曰誰告陛下上曰但我言如是何必就我索其所從得邪義府殊不引咎緩步而去上由是不悅望氣者杜元紀謂義府所居第有獄氣宜積錢二十萬緡以厭之義府信之聚斂尤急義府居母喪朔望給哭假輒微服與元紀出城東登古塚候望氣色或告義府窺覘災眚陰有異圖又遣其子右司議郎津召長孫无忌之孫延受其錢七百緡除延司津監右金吾倉曹參軍楊行穎告之夏四月乙丑下義府獄遣司刑太常伯劉祥道與御史詳刑共鞫之乃命司空李勣監焉事皆有實戊子詔義府除名流雋州津除名流振州諸子及壻並除名流庭州朝野莫不稱慶或作河間道行軍元帥劉祥道破銅山大賊李義府露布

勝之通衢義府多取人奴婢及敗各散歸其家故其露布云混
奴婢而亂放各識家而競入 乙未置雞林大都督府於新羅
國以金法敏爲之 丙午蓬萊宮舍元殿成上始移仗居之更
命故宮曰西內戊申始御紫宸殿聽政 五月壬午柳州蠻酋
吳君解反遣冀州長史劉伯英右武衛將軍馮士翽發嶺南兵
討之吐蕃與吐谷渾互相攻各遣使上表論曲直更來求援上
皆不許吐谷渾之臣素和貴有罪逃奔吐蕃具言吐谷渾虛實
吐蕃發兵擊吐谷渾大破之吐谷渾可汗曷鉢與弘化公主帥
數千帳奔國走依涼州請徙居內地上以涼州都督鄭仁泰爲
清海道行軍大總管帥右武衛將軍獨孤卿雲辛文陵等分屯
涼鄯二州以備吐蕃六月戊申又以左武衛大將軍蘇定方爲
安集大使節度諸軍爲吐谷渾之援吐蕃祿東贊屯青海遣使

者論仲琮入見表陳吐谷渾之罪且請和親上不許遣左衛郎將劉文祥使于吐蕃降璽書責讓之 秋八月戊申上以海東累歲用兵百姓困於征調士卒戰溺死者甚衆詔罷三十六州所造船遣司元太常伯竇德玄等分詣十道問人疾苦黜陟官吏德玄毅之曾孫也 九月戊午熊津道行軍總管右威衛將軍孫仁師等破百濟餘衆及倭兵於白江拔其周留城初劉仁願劉仁軌旣克真峴城詔孫仁師將兵浮海助之百濟王豐南引倭人以拒唐兵仁師與仁願仁軌合軍勢大振諸將以加林城水陸之衝欲先攻之仁軌曰加林險固急攻則傷士卒緩之則曠日持久周留城虜之巢穴羣凶所聚除惡務本宜先攻之若克周留諸城自下於是仁師仁願與新羅王法敏將陸軍以進仁軌與別將杜爽扶餘隆將水軍及糧船自熊津入白江以

會陸軍同趣周留城遇倭兵於白江口四戰皆捷焚其舟四百艘煙炎灼天海水皆赤百濟王豐脫身奔高麗王子忠勝忠志等帥衆降百濟盡平唯別帥遲受信據任存城不下初百濟西部人黑齒常之長七尺餘驍勇有謀略仕百濟爲達率兼郡將猶中國刺史也蘇定方克百濟常之帥所部隨衆降定方繫其王及太子縱兵劫掠壯者多死常之懼與左右十餘人遁歸本部收集亡散保任存山結柵以自固旬日間歸附者三萬餘人定方遣兵攻之常之拒戰唐兵不利常之復取二百餘城定方不能克而還常之與別部將沙吒相如各據險以應福信百濟旣敗皆帥其衆降劉仁軌使常之相如自將其衆取任存城仍以糧仗助之孫仁師曰此屬獸心何可信也仁軌曰吾觀二人皆忠勇有謀敦信重義但疑者所託未得其人今正是其感激

立效之時不用疑也遂給其糧仗分兵隨之攻拔任存城遲受信奔妻子奔高麗詔留劉仁軌將兵鎮百濟召孫仁師劉仁願還百濟兵火之餘比屋彫殘僵尸滿野仁軌始命瘞骸骨籍戶口理村聚署官長通道塗立橋梁補堤堰復陂塘課耕桑賑貧乏養孤老立唐社稷頒正朔及廟諱百濟大悅闔境各安其業然後修屯田儲糗糧訓士卒以圖高麗劉仁願至京師上問之曰卿在海東前後奏事皆合機宜復有文理卿本武人何能如是仁願曰此皆劉仁軌所爲非臣所及也上悅加仁軌六階正除帶方州刺史爲築第長安厚賜其妻子遣使齎璽書勞勉之上官儀曰仁軌遭黜削而能盡忠仁願秉節制而能推賢皆可謂君子矣 冬十月辛巳朔詔太子每五日於光順門內視諸司奏事其事之小者皆委太子決之 十二月庚子詔改來年

元壬寅以安西都護高賢爲行軍摠管將兵擊弓月以救于
闐是歲大食擊波斯拂菻破之南侵婆羅門吞滅諸胡勝兵
四十餘萬

麟德元年春正月甲子改雲中都護府爲單于大都護府以殷
王旭輪爲單于大都護初李靖破突厥遷三百帳于雲中城阿
史德氏爲其長至是部落漸衆阿史德氏詣闕請如胡法立親
王爲可汗以統之上召見謂曰今之可汗古之單于也故更爲
單于都護府而使殷王遙領之二月戊子上行幸萬年宮

夏四月壬子衛州刺史道孝王元慶薨丙午魏州刺史郇公
孝協坐贓賜死司宗卿隴西王博義等奏孝協父叔良死王事
孝協無兄弟恐絕嗣上曰畫一之法不以親疎異制苟害百姓
雖皇太子亦所不赦孝協有一子何憂乏祀乎孝協竟自盡於

第 五月戊申朔遂州刺史許悼王孝薨 乙卯於昆明之弄
棟川置姚州都督府 秋七月丁未朔詔以三年正月有事於
岱宗 八月丙子車駕還京師幸舊宅留七日壬午還蓬萊宮
丁亥以司列太常伯劉祥道兼右相大司憲竇德玄爲司元太
常伯檢校左相 冬十月庚辰檢校熊津都督劉仁軌上言臣
伏觀所存戍兵疲羸者多勇健者少衣服貧弊唯思西歸無心
展效臣問以往在海西見百姓人人應募爭欲從軍或請自辦
衣糧謂之義征何爲今日士卒如此咸言今日官府與曩時不
同人心亦殊曩時東西征役身沒王事並蒙敕使弔祭追贈官
爵或以死者官爵回授子弟凡度遼海者皆賜勲一轉自顯慶
五年以來征人屢經度海官不記錄其死者亦無人誰何州縣
每發百姓爲兵其壯而富者行錢參逐皆亡匿得免貧者身雖

老弱被發即行頃者破百濟及平壤苦戰當是時將帥號令許以勲賞無所不至及達西岸唯聞枷鎖推禁奪賜破勲州縣追呼無以自存公私困弊不可悉言以是昨發海西之日已有逃亡自殘者非獨至海外而然也又本因征役授勲級以爲榮寵而比年出征皆使勲官挽引勞苦與白丁無殊百姓不願從軍率皆由此臣又問曩日士卒留鎮五年尚得支濟今爾等始經一年何爲如此單露咸言初發家日惟令備一年資裝今已二年未有還期臣檢校軍士所留衣今冬僅可充事來秋以往全無準擬陛下留兵海外欲殄滅高麗百濟高麗舊相黨援倭人雖遠亦共爲影響若無鎮兵還成一國今旣資戍守又置屯田所籍士卒同心同德而衆有此議何望成功自非有所更張厚加慰勞明賞重罰以起士心若止如今日已前處置恐師衆疲

老立效無日逆耳之事或無人爲陛下盡言故臣披露肝膽昧死奏陳上深納其言遣右威衛將軍劉仁願將兵度海以代舊鎮之兵仍敕仁軌俱還仁軌謂仁願曰國家懸軍海外欲以經略高麗其事非易今收穫未畢而軍吏與士卒一時代去軍將又歸夷人新服衆心未安必將生變不如且留舊兵漸令收穫辦具資糧節級遣還軍將且留鎮撫未可還也仁願曰吾前還海西大遭讒謗云吾多留兵衆謀據海東幾不免禍今日惟知准敕豈敢擅有所爲仁軌曰人臣苟利於國知無不爲豈恤其私乃上表陳便宜自請留鎮海東上從之仍以扶餘隆爲能津都尉使招輯其餘衆 初武后能屈身忍辱奉順上意故上排群議而立之及得志專作威福上欲有所爲動爲后所制上不勝其忿有道士郭行真出入禁中嘗爲厭勝之術官者王伏勝

發之上大怒密召西臺侍郎同東西臺三品上官儀議之儀因言皇后專恣海內所不與請廢之上意亦以爲然即命儀草詔左右奔告于后后遽詣上自訴詔草猶在上所上羞縮不忍復待之如初猶恐后怨怒因給之曰我初無此心皆上官儀教我儀先爲陳王諮議與王伏勝俱事故太子忠后於是使許敬宗誣奏儀伏勝與忠謀大逆十二月丙戌儀下獄與其子庭芝王伏勝皆死籍沒其家戊子賜忠死于流所右相劉祥道坐與儀善罷政事爲司禮太常伯左肅機鄭欽泰等朝士流貶者甚衆皆坐與儀交通故也自是上每視事則后垂簾於後政無大小皆預聞之天下大權悉歸中宮黜陟生殺決於其口天子拱手而已中外謂之二聖太子右中護檢校西臺侍郎樂彥璋西臺侍郎孫處約並同東西臺三品

二年春正月丁卯吐蕃遣使入見請復與吐谷渾和親仍求赤水地畜牧上不許 二月壬午車駕發京師丁酉至合璧宮

上語及隋煬帝謂侍臣曰煬帝拒諫而亡朕常以爲戒虛心求諫而竟無諫者何也李勣對曰陛下所爲盡善群臣無得而諫

三月甲寅以兼司戎太常伯姜恪同東西臺三品恪寶誼之子也 辛未東都乾元殿成閏月壬申朔車駕至東都 疎勒

弓月引吐蕃侵于闐敕西州都督崔知辯左武衛將軍曹繼叔

將兵救之 夏四月戊辰左侍極陸敦信檢校右相西臺侍郎

孫覲約太子右中護檢校西臺侍郎樂彥瑋並罷政事 祕閣

郎中李淳風以傳仁均戊寅曆推步浸疎乃增損劉焯皇極曆

更撰麟德曆五月辛卯行之 秋七月己丑兗州都督鄧康王

元裕薨 上命熊津都尉扶餘隆與新羅王法敏釋去舊怨八

月壬子同盟于熊津城劉仁軌以新羅百濟耽羅倭國使者浮海西還會祠泰山高麗亦遣太子福男來侍祠冬十月癸丑皇后表稱封禪舊儀祭皇地祇太后昭配而令公卿行事禮有未安至日妾請帥內外命婦奠獻詔禪社首以皇后爲亞獻越國太妃燕氏爲終獻壬戌詔封禪壇所上帝后土位先用藁秸陶匏等並宜改用茵褥疊爵其諸郊祀亦宜準此又詔自今郊廟享宴文舞用功成慶善之樂武舞用神功破陳之樂丙寅上發東都從駕文武儀仗數百里不絕列營置幕彌亘原野東自高麗西至波斯烏長諸國朝會者各帥其屬扈從穹廬毳幕牛羊駝馬填咽道路時比歲豐稔米斗至五錢麥豆不列于市十一月戊子上至濮陽竇德立騎從上問濮陽謂之帝立何也德立不能對許敬宗自後躍馬而前曰昔顓頊居此故謂之帝